

1. Go Gáddjá-guovža borai geasi

Murruimurr dáppe Ukselmaoivvis!

Lean Urho Kekkonen álbmotmeahci gufihtar
Ukselmaoivvi Elsa.

Ásan Ukselmaoivi-nammasaš váris,
muhto lihkanan maiddái vuovddis, jogaid guoras ja jekkiin.



Eandalii luomeáigge jođán luomemeahcis...nappo jekkiin.
Luomeáigi lea gal jo guhkkin duogábealde, go lea guovddáš dálvi.
Dahje sáhttáhan dan maiddái jurddašit nuge,
ahte luomeáigi lea easka ovddabealde,
go dál lea dálvi, ođđajagimánnu
ja ođđa jahki lea easka álgán.


Lean gullan mitaluvvon,
ahte jus ođđajagiija leat almmis olu násttit,
čuovvovaš geasi šaddet olu luopmánat.
Muitetgo geahččat ođđajagiija albmái?
Ledjego doppe olu násttit?
Vai ledjego doppe dušše olbmuid báhcán násterakehtat?

Na, luopmániin ja luomeáiggis munnje boahdá millii ustiban Gáddjá-guovža.
Deiven Gáddjá-guovžža mañimuš luomeáigge,
go guktot leimme lubmemin Dávgevárjeakkis.
Doppe Gáddjá-guovža mitalii munnje ná:

*”Geasset gávdnojit mánggalágan herskot,
muhto luomi lea gal njálgaseamos!
Luopmániid njamadan njálbmái jeakki balssas.
Luomi lea máihlái ja njálgga.
Boran dievva čoavji.
Lasihan dálvevuorkán dorkan vuollái.
Dainna nagodan oadđit olles dálvi.
Munhan duođaige oadán oppa dálvi.*

Mađi eanet biebmui lea dorkka vuolde, dađi buoret.

*Buoiddimus mun lean čakčat,
go lean borran olles geasi.
Dahjege...
in cokka njálbmái geasi!
Dallehan beaivi boalddašii čoavji
ja muhtumin baján buvttášii rožohaga.*



*In cokka njálbmái geasi,
muhto boran olles geasi áigge buotlágan herskuid maid luonddus gávdná.*

*Čakčat,
Go vuosttas muohta lea eatnamis,
čáŋan beassái.
Beasi lea gárvvistan alccesan ráfálaš ja boittobeale báikái.
Borranlustuge geahppána ovdal dálvenahkáriidda vuodjuma.
Dálvenahkárat leat sitkadat.
Ođđajagimánus jorgalan nuppi gilgga ala ja joatkkán oadđima.
Nieguin oainnán máihlái luopmániid,
stuorra gotkkabesiid,
jorba čoarbbeliid
ja guohcarásiid lieđđumin.”*

Ođđajagimánu dearvvuođaiguin Urho Kekkonen álbmotmeahci gufhtar

Elska

Gufhttara dehálaš áššiid merkii dása báhpárii Kristiina Aikio. Jorgalus Pentti Pieski.

Bargobihtta:

Sárggo gova, maid Gáddjá-guovža niegada?

